

Nua va la Scozia?

Madrid e Paris teman

DA GUIU SOBIELA-CAANITZ

■ Votantas e votants dal Reginavel Unì da Gronda Britannia ed Irlanda dal nord (RU) han giavischè cun 51,9% da las vuschs da sa retrair da l'Uniun europeica (UE). Cun lezza votaziun han votantas e votants da la Scozia, da l'Irlanda dal nord e da Gibraltar giavischè percenter da restar en l'UE. La maioritad dal reginam less pia obligar trais parts constitutivas da quest reginam da sa retrair cunter veglia da l'UE; en Scozia han schizunt 62% da votantas e votants vuschà per l'UE. La primministra scotta Nicola Sturgeon è lura sgulada tar l'UE a Bruxelles/Brussel, nua che parsura Jean-Claude Juncker ed il president dal parlament Martin Schulz l'han retschevida e taclada. Sturgeon ha sin quai declarà: «Jau sun vegnida qua per ma segirar ch'ins auda la vusch da la Scozia e ch'ins chapescha sia posiziun (...). Qua hai chattà portas avertas. Sch'i dat per la Scozia ina via per restar en l'UE, vi jau pruvar da chattar questa via» (cità da BBC News). Quai ha grittentà Mariano Rajoy, il primminister spagnol ad interim. Lez ha declarà: «La Scozia n'è betg cumpetenta per tractar cun l'UE (...). Sche la Gronda Britannia sa retira, vala quai era per la Scozia» (cità da BBC News). La banca americana JP Morgan resguarda però sco probabel che la Scozia vuschia per l'indipendenza e sa stgaffeschia in'atgna munaida il pli tard per 2019. «Segund ina retschertga d'opiniun da l'emna passada prenden 54–59% da Scottas e Scots partida per l'indipendenza» («The Economist», 2 da fanadur 2016, p. 32, chavazzin «Fragmentation nation»).

En la Mar dal sid

Rajoy tema che la Catalogna (7 565 603 olmas), la quala giavischa era l'indipendenza politica, possa profitar sco la Scozia da la bainvulientscha da las autoritads europeicas per vegnir libra. Sturgeon ha commentà ch'ils plets da Rajoy na la sorprendian betg. Ma François Hollande, president da la Frantscha en fin a 2017, è s'exprimì en il medem senn: «Ins tracta cun l'entir RU, betg mo cun ina part» (cità da BBC News). Pertge questa gritta cunter il pitschen pievel scot che sto patir da l'arbitrarietà britannica senza resguard? Vul era la Frantscha umiliar in pajais rebel che vul s'emancipar? Tgenin? I vegn endament la Corsica; ma sia regenza giavischa mo dapli autonomia e vul restar franzosa. Il misteri sa sclarescha «down under» en la Mar dal sid, en quai che Charles de Gaulle (1890–1970) numnava «des poussières»: Las inslas da la Nova Caledonia (NC, 268 270 olmas), franzosas dapi 1853, cun 41,2% indigens e 29,2% Europeans, a nordost da l'Australia ed a vest da las Fidschi. «Il referendum davart l'indipendenza [da la NC] è previs per 2018 (...). L'unica activitad relevanta è l'extracziun da nichel»*. Il futur dal pajais è malsegir, tant pli cun la crisa mundiala dal nichel. Primminister Manuel Valls ha gia entschavi a pinar il referendum. Co vuscha lura il pievel da la NC? Vul el vegnir independent, sco las Fidschi (881 065 olmas), u restar autonom, sco la Polinesia franzosa (276 831 olmas)?

* De Agostini Libri S.p.A., Calendario Atlante De Agostini 2016. Novara (info@geo4map.it, 2015) p. 594, chapitel «Francia».